

Ils servetschs publics sut la marella

Il survegliader dals pretchs fa squitsch

DA LUCAS DEPLAZES / ANR

■ **L'onn passà ha prendì il survegliader dals pretchs en il visier ils divers servetschs publics e procurà per correcturas en favur dals consuments.** Da

las 1867 reclamaziuns dals consuments da l'onn 2013 ch'il survegliader dals pretchs ha examinà han 15% pertutgà La Posta e 12% il sector da la sanadad publica. Sco quai che ha punctuà il survegliader *Stefan Meierhans* a chaschun da l'infurmaziun a las medias a Berna manchia sin divers secturs ina concorrenza effizienta che reguleschia ils pretchs. Ord quest motiv fiss necessaria ina revisiun da la lescha davart ils cartels. En in parlament saja ina revisiun per part dispartiva. Tant pli saja necessari d'avair in egl avert sin il svilup dals pretchs, spezialmain tar ils servetschs publics. Per evitar in augment da las taglias vegnia magari fatg diever d'in augment da las taxas.

La Posta fa correcturas

Sut il squitsch dal survegliader dals pretchs ha reducì La Posta diversas tariffas e communitgà ch'ella mantegna las taxas per las brevs e per ils pachets sin il nivel actual fin il mais d'avrigl 2016. Che La Posta trametta quest onn a minga chasada quatter marcas dad in franc è bain il mussament che ils pretchs per las brevs èn memia auts, sco quai che ha pretendì il survegliader dals pretchs.

Ils ospitals custan memia bler

Tenor las calculaziuns dal survegliader dals pretchs èn memia autas las pauschalas per cas, introducidas avant dus onns per la finanziaziun dals ospitals. Per l'onn 2013 ha erù Meierhans in pretsch da basa da 9005 francs per ospitals ordai-fifer lieus cun università e 9708 per ospitals cun università. En 65 cas ha Meierhans drizzà recumandaziuns als chantuns pertutgads. Tut en tut stattan en dis-

cussion tschients milliuns francs. Uss sto il tribunal administrativ federal prender posiziun davart las diversas reclamaziuns.

La tgira en egl

Bleras reclamaziuns ha il survegliader dals pretchs retschet davart ils custs per la tgira en chasas d'attempads. En plirs chantuns vegnan messas a quint als pazients custs che surpassan las directives legalas. Meierhans spetga che talas incunvegnientschas vegnian curregidas, tant pli che quellas sa basan uss sin decisiuns da las dretgiras.

Potenzial da spargn tar ils medicaments

In studi dal surveglider dals pretchs de-

mussa ch'il potenzial da spargn tar ils medicaments n'è anc betg tratg a niz avunda. Var 380 milliuns francs pudess ins spargnar cun prescriber dapli generica cun il medem effect sco il medicament original. En Svizra – nua che la cumpart da generica è modesta – èn ils pretchs per generica 42% pli chers ch'èn noss pajais vischins. Il survegliader dals pretchs pretendia ina midada dal sistem vertent e propona d'indemnisar mo ils custs dal medicament il pli bunmartgà.

Energia

En connex cun la strategia d'energia 2050 vul Meierhans immediat ina taxa sin l'energia che è colliada cun ina restituziun al consument. Per cuntanscher

las finamiras davart il clima saja il meglier ina taxa directiva liada a la restituziun, è persvas il survegliader dals pretchs. El ha criticatgà il cussegl federal che ha augmentà il cunfin maximal da rendita per las raits d'electricità, quai muntia per ils consuments ina chargia supplementara da 100 fin 200 milliuns francs.

Finamiras per l'onn 2014

En il center da las activitads per quest onn stattan las tariffas per las lubientschas da construcziun che varieschian per plirs millis francs d'in chantun a l'auter. Meierhans persequitescha vinavant ils pretchs per il servetsch public, sur tut ils pretchs per l'energia ed il svilup dals custs per la sanadad publica.



Stefan Meierhans, il survegliader dals pretchs, pretendia dapli concorrenza e trasparenza tar ils servetschs publics. KEYSTONE